

竹書紀年義證卷之三十一

通州 雷學淇 述

晉文公

元年 丙戌 晉城荀

此周襄王十七年魯僖公二十五年也春秋經曰僖公二十四年冬晉侯夷吾卒晉語亦謂惠公卒于魯僖公之二十四年十月其子懷公立三月見殺在建丑之月晉用夏正故懷公之卒在惠公十五年限內懷公雖立數月未嘗改元故此丙戌之歲爲晉文公之元年杜氏左傳注從傳違經不辨明魯歷夏正非是荀卽獻公所滅詳上

四年周襄王會諸侯于河陽

此襄王二十年魯僖公二十八年也河陽晉地名賈逵左傳注用穀梁傳說謂河陽晉之溫也杜氏注云今河內有河陽縣二地相近故異稱溫詳夏后紀河陽縣故城在今懷慶孟縣西南三十里春秋僖公二十八年經曰晉侯侵曹晉侯伐衛夏四月己巳晉侯齊師宋師秦師及楚人戰于城濮楚師敗績五月癸丑公會晉侯齊侯宋公蔡侯鄭伯衛子莒子盟于踐土冬公會晉侯齊侯宋公蔡侯鄭伯陳子莒子邾子秦人于溫天王狩于河陽左傳謂己巳楚師敗績晉師三日館穀及癸酉而還甲午至于衡



雍作王宮于踐土鄉役之三日五月丁未獻楚俘于王已酉王享醴命晉侯侑王命尹氏及王子虎內史叔興父策命晉侯爲侯伯七月丙申振旅愷以入于晉冬會于溫討不服也是會也晉侯召王以諸侯見且使王狩仲尼曰以臣召君不可以訓故書曰天王狩于河陽言非其地也且明德也穀梁傳曰天王守于河陽全天王之行也若爲將會諸侯之朝也爲天王諱也水北爲陽山南爲陽溫河陽也愚按經分溫與河陽爲二則杜注之說爲是溫雖近河陽而王之會狩實不在溫也左傳正義謂舊史當依實而書晉侯召王且使王狩聖人改春秋之文爲天王狩于河陽魏史亦改晉乘之文爲王會諸侯于河陽此卽因舊史所書不可以訓故改之以正其名

八年晉文公卒

此襄王二十四年魯僖公三十二年也春秋經謂是年十二月己卯晉侯重耳卒自僖公二十四晉惠公卒至此是文公在位實八年也依魯歷言之則僖公之二十五年爲晉懷公元年文公在位止有七年因晉用夏正懷公無年故文公之立爲八年左傳將惠公之卒移前一年史記年表及晉世家從之謂惠公立十四年文公立九年竝誤○再按紀年爲晉魏之史記其原本錄晉魏之事必詳宋初傳本止記其異於左氏經傳者以備稽核其同者則不錄而唐以前諸書徵引又皆取春秋經傳而不引紀年故紀年之同於經傳者多不傳於後如文公之霸業紀年豈有不詳記者而今皆不見卽此之故若

史通惑經篇唐書劉貺傳所引皆其僅存者矣

晉襄公

元年甲午

此襄王二十五年也晉世家曰文公卒子襄公歡立

六年洛絕于洵

此襄王三十年魯文公之五年也洵地名水經曰洛水東過偃師縣故城南又東逕百谷塢北又北陽渠水注之酈注引紀年云晉襄公六年洛絕于洵卽此處也然則洵卽陽渠之故名矣隋時又改名通濟渠在今偃師縣南

七年晉襄公卒

此襄王三十一年魯文公六年也春秋經曰文公六年八月乙亥晉侯驩卒

晉靈公

元年辛丑

此襄王三十二年魯文公七年也晉世家曰襄公卒太子夷臯少晉人以難故欲立長君太子母繆嬴日夜抱太子以號泣于朝曰先君何罪其嗣亦何罪舍適而外求君將安置此出朝則抱以適趙盾所

頓首曰先君奉此子而屬之子曰此子材吾受其賜不材吾怨子今君卒言猶在耳而棄之若何趙盾與諸大夫皆患穆嬴且畏誅乃背所迎而立太子夷臯是爲靈公周書諡法曰死而志成曰靈亂而不損曰靈極知鬼事曰靈不勤成名曰靈死見神能曰靈好祭鬼神曰靈

二年周襄王陟

此襄王三十三年魯文公八年也春秋經曰文公八年秋八月戊申天王崩周本紀曰三十三年襄王崩子頃王壬臣立世本作頃王巨

八年彗星入北斗周頃王陟

此頃王六年魯文公十四年也彗星妖星也史記正義曰天彗一名掃星本類星末類彗小者數寸長或竟天而體無光假日之光故夕見則東指晨見則西指若日南北皆隨日光而指光芒所及爲災變見則兵起除舊布新所指之處弱也史記天官書曰北斗七星所謂璇璣玉衡以齊七政杓攜龍角衡殷南斗魁枕參首又曰斗爲帝車運于中央臨制四鄉分陰陽建四時均五行移節度定諸紀皆繫于斗虞書曰在璇璣玉衡以齊七政卽謂此故星經曰璇璣謂北極星也玉衡謂斗九星也

劉昭漢書補注

蓋在

天之曜斗爲之綱左旋歷十二辰以成歲功右轉歷十二辰而分三正其中有天理四星乃太乙之精彗孛人之卽滅晦天理之象也此後九年中齊晉吳楚競行天子之事齊宋莒魯並弑其君卽其應春

秋經曰文公十四年秋七月有星孛入于北斗公羊傳曰孛者何彗星也其言入于北斗何北斗有中
也何以書記異也何休注云中者魁中穀梁傳曰孛之爲言猶莩也其曰入北斗斗有環域也左傳曰
文公十四年春頃王崩周公閱與王孫蘇爭政故不赴晉世家曰靈公八年周頃王崩公卿爭權故不
赴晉使趙盾以車八百乘平周亂而立匡王據左傳王陟在彗星入北斗前因周人不赴晉平周亂而
後書故紀列于後韋昭洞記曰頃王六年彗星入北斗晉趙盾率諸侯平周亂立王子樊是爲匡王
十四年周匡王陟

此匡王六年魯宣公二年也春秋經曰宣公二年冬十月乙亥天王崩諡法曰貞心大度曰匡
晉靈公爲趙穿所殺趙盾使穿迎公子墨臀于周立之

秦漢以後言趙系者不同晉語曰趙衰其先君之御戎趙氏之弟也韋注以衰爲公明之少子趙世家
謂叔帶五世而生趙夙夙生公孟公孟生衰衰生盾索隱引世本曰公明生共孟及趙夙夙生成季衰
衰生宣孟盾左傳僖公二十三年杜注以衰爲夙弟宣二年正義引晉語證之改趙氏爲趙夙引世本
云夙爲衰祖穿爲夙之曾孫謂世本轉寫多誤其本未必然從世族譜盾是衰子穿是夙孫之說謂穿
乃盾之從父昆弟之子也文十二年正義亦然國語韋注及杜氏世族譜謂穿是夙之庶孫于盾爲從
父昆弟古史考以共孟生衰爲史記之誤合諸說推之蓋公明生夙夙生共孟及衰國語所謂其先卽

指趙夙君之御戎卽指獻公作二軍趙夙御戎也趙氏卽指共孟庶長爲孟衰爲夙之適子而實孟之季弟韋注誤將先君二字連讀故以衰爲公明之少子其實趙衰並未嘗爲君御戎御戎者乃趙夙經有文可知衰與公孟皆夙之子非公明之子矣共孟生穿衰生盾故韋注杜譜以穿爲夙之庶孫於盾爲從父昆弟也正義知夙爲衰祖是轉寫之誤何以又謂穿是盾之從父昆弟之子乎盾爲衰妻叔隗所生乃衰之適子故嗣卿位公子黑臀者文公之子襄公弟也春秋經曰宣公二年秋九月乙丑晉趙盾弑其君夷臯左傳曰晉靈公不君秋九月乙丑趙穿攻靈公于桃園宣子未出山而復大史書曰趙盾弑其君以示於朝宣子曰不然對曰子爲正卿亡不越竟反不討賊非子而誰宣子曰烏呼我之懷矣自貽伊慼其我之謂矣孔子曰董狐古之良史也書法不隱趙宣子古之良大夫也爲法受惡惜也越竟乃免宣子使趙穿逆公子黑臀於周而立之壬申朝于武宮周語曰成公之生也其母夢神規其臀以墨曰使有晉國故命之曰黑臀史記晉世家曰趙盾使趙穿迎襄公弟黑臀于周而立之是爲成公成公者文公少子其母周女也愚按臀乃襄公託孤之臣靈之不君亦止少年驕縱非斷斷不可挽回者在盾之義竭其股肱之力加以忠貞未必絕無匡救乃君死卽謀廢立旣立之矣積十四年之久養成君惡始驟諫于終其處心積慮早已置靈于死地矣春秋書曰晉趙盾弑其君夷臯所以聲其惡而誅之也左氏謂越竟乃免此段必非夫子之言亦非傳文乃劉歆所增屬附和新莽之亂者君臣之

義無所逃于天地之間安有越竟而卽能免者縱使越竟其反不討賊又將何辭紀年書云晉靈公爲趙穿所殺所以錄其實也下繼云趙盾使穿迎公子黑臀于周立之此正著趙盾不討賊之罪見穿之弑君實亦盾使之耳不然太史已宣言于朝矣盾何難立討賊穿使膺顯戮乃不惟不討而且恐新君之立而誅之也卽使賊逆新君預爲之地以此推按盾之與謀弑君昭然可觀矣觀趙穿弑君下緊接趙盾使穿竹書之紀亦可謂微而顯盡而不汙者也春秋乃魯史故直書盾弑紀年乃晉書故據事書之其義自見杜元凱生典午之世故此篇注云越竟則君臣之義絕可以不討賊何紕謬乃爾

晉成公

元年乙卯

史記年成表晉公元年當周定王元年魯宣公三年

六年晉成公與狄伐秦獲秦譟殺之絳市六日而蘇

此周定王六年秦桓公三年魯宣公八年也狄謂白狄左傳正義云白翟與秦相近當在晉西潛夫論志氏姓曰嬀姓白翟嬀音西卽黃帝子酉姓之裔猶懼之爲嬀吉之爲姑也春秋經曰夏晉師白翟伐秦左傳曰宣公八年春白翟及晉平夏會晉伐秦晉人獲秦譟殺諸絳市六日而蘇杜注云記異也晉世家曰成公六年伐秦虜秦將赤索隱曰赤卽斥謂斥候之人也

七年晉成公卒于扈

此定王七年魯宣公九年也春秋經曰宣公九年九月晉侯宋公衛侯鄭伯曹伯會于扈晉侯黑臀卒于扈左傳曰會于扈乃還杜注云謀齊陳卒于竟外故書地漢書郡國志曰河南尹卷縣有扈城亭劉昭補注云杜預曰在縣西北蓋卽莊公二十三年之盟地也今在開封原武縣西北春秋時屬鄭

晉景公

元年 壬戌

此周定王八年魯宣公十年也晉世家曰七年成公卒子景公據立諡法曰由義而濟曰景布義行規曰景

十一年齊國佐來獻玉磬紀公之甌

此定王十八年齊頃公十年魯成公二年也齊世家謂桓公立四十三年卒長衛姬生無脆少衛姬生惠公元鄭姬生孝公昭葛嬴生昭公潘密姬生懿公商人宋華子生公子雍十月乙亥齊桓公卒易牙入與豎刁因內寵殺羣吏立公子無脆爲君三月死無諡次孝公次昭公次懿公次惠公惠公卒子頃公無野立六年晉使卻克于齊齊夫人帷而笑之十年齊侵魯衛故三國同伐齊戰于鞏齊師敗追至馬陵齊侯請以寶器謝春秋經曰成公二年六月癸酉季孫行父臧孫許叔孫僑如公孫嬰齊帥師會

晉卻克衛孫良夫曹公子首及齊侯戰于鞏齊師敗績秋七月齊侯使國佐如師己酉及國佐盟于袁婁左傳謂齊師敗績晉師從齊師入自邱輿擊馬陘齊侯使賓媚人賂以紀甌玉磬與地卽此事也賓媚人卽國佐國氏乃天子之命卿亦齊之公族也左傳杜注謂懿仲生國莊子歸父歸父生國武子佐卽賓媚人懿仲以前不得詳矣玉磬卽鳴球天子宮縣之樂器紀公之甌卽齊人滅紀所得寶器甌謂甌之無底者此甌亦以玉爲之左傳杜注穀梁傳范注所謂玉甌矣何休公羊傳注以甌爲地名非是又二傳無玉磬二字紀甌與地謂是國佐如晉卻克索致者與左傳竹書皆異紀云來獻謂如師之時止以甌磬與地許之及受盟師退八月乃致地于魯衛又令國佐聘晉以磬甌爲庭實之獻也故經書魯取汶陽田在是年八月史謂齊頃公朝晉欲尊王晉景公景公不敢受乃歸卽明年事也是年晉初置六卿

十四年周定王陟

此定王二十一年魯成公五年也春秋經曰成公五年冬十有一月己酉天王崩周本紀曰匡王六年崩弟瑜立是爲定王二十一年定王崩子簡王夷立

十九年晉景公卒

此簡王五年魯成公十年也是時晉已遷居新田今山西曲沃縣西南二里絳城是也春秋經曰成公

十年丙午晉侯驪卒左傳曰五月公疾病六月丙午晉侯欲麥將食張如廁陷而卒

晉厲公

元年辛巳

此簡王六年魯成公十一年也成十年左傳曰晉侯有疾五月晉立太子州蒲以爲君而會諸侯伐鄭晉世家亦云景公病立其太子壽曼爲君是爲厲公後月餘景公卒然則厲公於其父未卒之前卽已立矣

六年魯刺公子偃

此簡王十一年魯成公十六年也公子偃魯宣公之庶子成公之庶弟也左傳謂叔孫僑如通于成公之母穆姜欲去季孟而取其室公出會晉師穆姜送公而使逐二子公以晉難告曰請反而聽命姜怒公子偃公子鉏趨過指之曰女不可是皆君也公待于壞隤申宮敝備設守而後行是以後宣伯讒公及季孟于晉晉侯不見公九月執季文子于莒邱公還待于鄆使子叔聲伯請于晉赦季孫冬十月出叔孫僑如而盟之僑如奔齊十二月季孫歸刺公子偃杜注云偃與鉏俱爲姜所指而獨殺偃偃與謀七年晉厲公卒

此簡王十二年楚共王十七年宋平公二年魯成公十七年也春秋經曰成公十八年春王正月晉殺

其大夫胥童庚申晉弑其君州蒲左傳謂成公十七年十二月晉厲公欲盡去羣大夫而立其左右壬午胥童夷羊五長魚矯殺卻錡卻犇卻至以甲劫欒書中行偃于朝公釋之公使胥童爲卿公遊于匠麗氏欒書中行偃遂執公閏月乙卯晦殺胥童十八年正月庚申晉欒書中行偃使程滑弑厲公葬之于翼東門之外以車一乘據此是厲公爲書偃所弑紀曰卒者晉世家載異說云書偃捕厲公囚之囚六日死是厲公雖被執實自死經書弑者因囚而死是卽弑也紀爲尊者諱以自死爲詞亦猶魯之隱閔經皆書公薨矣

楚共王會宋平公于湖陽

楚世家曰三十七年武王卒子文王熊貲立十三年卒子熊羆立是爲杜敖五年弟憚弑杜敖代立是爲成王四十六年太子商臣以兵圍成王王自絞死商臣代立是爲穆王十二年卒子莊王侶立二十三年莊王卒子共王審立宋世家曰九年穆公卒兄宣公子與夷立是爲殤公九年華督弑殤公迎穆公子馮于鄭而立之是爲莊公十九年莊公卒子湣公捷立十一年南宮萬弑湣公立湣公弟禦說爲君是爲桓公三十一年桓公卒太子茲甫立是爲襄公十四年卒子成公王臣立十七年成公卒弟禦殺太子及大司馬而自立宋人共殺禦而立成公少子杵臼是爲昭公九年王姬使衛伯攻殺昭公弟鮑革立是爲文公二十二年文公卒子共公瑕立十三年共公卒司馬唐山攻殺太子肥乃立共公少

子成是爲平公自楚武王宋穆公以下紀年皆失錄水經泚水注引此紀無年近世傳本皆係于晉厲公卒下考春秋左傳成襄之世宋服晉鄭服楚宋平之立魚石奔楚元年鄭侵宋敗于洧陵三年楚納魚石于彭城宋自是或鄭或楚歲與交兵終楚共之世未嘗與宋和好湖陽之會不可詳矣湖陽今河南桐柏縣地漢時爲縣屬南陽郡

晉悼公

元年 戊子

此簡王十三年魯成公十八年也悼公者文公之元孫襄公之曾孫卽孫周也左傳成十八年春王正月庚申晉欒書中行偃使程滑弑厲公使荀偃士魴逆周子于京師而立之生十四年矣諸大夫逆于清庚午盟而入辛巳朝于武宮二月乙酉朔晉悼公卽位于朝晉世家曰悼公周者其大父捷晉襄公少子也不得立號爲桓叔桓叔最愛桓叔生惠伯談談生悼公周又謂厲公之弑在悼公元年正月此因不知晉用夏正故從左傳之說其實厲公卒于八年十一月悼公卽位于是年之孟春也經謂成公十七年無閏故傳之二月乙酉朔卽魯歷之三月夏正之正月也左傳謂十七年有閏故與經文差異此傳之誤也從魯歷則此爲晉厲公八年史記年表世家皆謂厲公在位七年

二年周簡王陟

此簡王十四年魯襄公元年也周本紀曰十四年簡王崩子靈王泄心立周書諡法曰壹德不懈曰簡
平易不疵曰簡

十六年晉悼公卒

此靈王十四年魯襄公十五年也春秋經曰襄公十五年冬十有一月癸亥晉侯周卒晉世家曰十五年冬悼公卒子平公彪立史記少一年者年表從左傳以魯襄公元年爲晉悼公元年不知傳誤置一
閏晉用夏正傳之成公十八年二月乙酉朔卽悼公之元年正月也

晉平公

元年 甲辰

此靈王十五年也

十三年周靈王陟

此靈王二十七年魯襄公二十八年也春秋經曰襄公二十八年十有二年甲寅天王崩杜注云靈王
也周本紀曰二十七年靈王崩子景王貴立皇覽曰靈王冢在河南城西南栢亭西周山上
二十五年冬有星出婺女

此景王十三年魯昭公十年之正月也婺女者元枵之宿星一名須女昭十年左傳曰春王正月有星

出于婺女鄭裨竈言于子產曰七月戊子晉君將死今茲歲在顓頊之虛姜氏任氏實守其地居其維首而有妖星焉告邑姜也邑姜晉之妣也天以七紀戊子逢公以登星于是乎出吾是以譏之

二十六年五月晉平公卒

此景王十三年魯昭公十年之七月也春秋經曰昭公十年秋七月戊子晉侯彪卒晉世家曰二十六年平公卒子昭公夷立

晉昭公

元年庚午河水赤于龍門三里

此景王十四年也龍門山名禹貢曰浮于積石至于龍門又曰導河積石至于龍門漢書地理志左馮翊夏陽龍門山在北水經曰河水又南出龍門口汾水從東來注之注云魏書土地記曰梁山北有龍門山大禹所鑿通今陝西韓城縣東北五十里河上有龍門山河水赤者記異也京房易傳曰君溷于酒淫于色賢人潛國家危厥異流水赤劉向以爲火沴水三里者九百步也大戴禮記主言曰三百步而里

六年晉昭公卒

此景王十九年魯昭公十六年也春秋經曰昭公十六年秋八月己亥晉侯夷卒晉世家曰六年昭公

卒子頃公去疾立六卿彊公室卑

冬十月桃杏華

記異也

